

精鈔
大字

隨

園

全

集

詩集

十六

欽定四庫全書
欽定四庫全書

小倉山房詩集卷二十九 癸卯

錢唐袁枚子才

霞裳就婚汪氏已五朝矣芳訊杳然賦詩調之兼呈新婦

昨年遠走天台路。此日直攀玉洞花。從古劉郎為壻樂。胡麻飯喫女兒家。

八載青衿入

泮池婚期太覺阮修遲。隨園烏鵲爭填路。助汝銀河喚渡時。

入市羊車久擅名。今宵燈

下見卿卿。佳人不語低頭喜。消受檀奴過一生。

杏花紅嫩柳條麤。點綴妝臺入畫圖。底

事清明尚飛雪。想同仙子鬪肌膚。

五日悒悒住洞房。定知努力作鴛鴦。棠砧滋味親嘗

後。示我房中曲一章。

關雎彈出正聲希。回首桑間事事非。從此倉山桃李樹。好花不逐

亂風飛。

繡被原該覆鄂君。書來何必借殷勤。只嫌山裏名香少。還倩荀郎身上熏。

來借錦被

獻題花葉寄妝樓。好作羹湯代束脩。莫惱袁絲太無賴。奪人夫壻出山遊。

約彌月後同遊

山黃

轉眼秋風桂影高。明春郎賦鬱輪袍。斷機勸學何人事。應替先生一半勞。

海棠下作

堆滿萬重雲。西窗日漸曛。海棠香自有。只要靜中聞。

同霞裳遊黃山過采石登太白樓

霞裳美少年。絕似崔宗之。攜登謫仙樓。懷古有餘思。春樹尚披錦。江聲學詠詩。重重碑題滿。

小倉山房言集 卷二
繼響知為誰。惟有蕭生畫。揮毫得天倪。歲久壁泥蝕。我來見已遲。昔人不可作。後來孰與期。急沽斗酒至。臨風兩手持。仰呼太白星。下來飲一卮。

采石東去磯上有賈似道鐫聯壁二字

千尋危石劃江開。賈相當年興太佳。家裏蘭亭八千匣。尚來此處作摩厓。

從平溝行至山溪作

雞唱平溝客起遲。荒原漠漠草離離。竹輿行過三溪口。漸漸青山來引詩。

琴溪相傳是琴高騎鯉處

琴溪山。若待人。終朝鶴立向水濱。琴溪水清可弄。穿出平橋十一洞。洞中丹書不可識。浪引寒煙搖石壁。溪草溪花秋復春。仙人一去無消息。我笑琴高子。終竟非仙才。但騎鯉魚去。不騎鯉魚來。

榆嶺

榆嶺高難上。肩輿換步行。見山生足力。聽水惹吟聲。路狹煙雲讓人稀。鳥雀迎息勞坐巖石。刻竹自題名。

到新安遊雄村曹侍郎園隨同令弟顧厓太史泛舟小南海

遊園必到辟疆宅。咏勝必登給事堂。况復雄村十五里。水容山態相迎將。主人邀我入瑞室。

歷盡波陀三百級。牆外風帆入座飛。林中怪石迎人揖。層層水木湛清華。對景懷人意倍加。不知朝裏青雲客。何日歸看綠野花。難弟同遊小南海。江中別有金焦在。不是人間香火時。鳥聲歡動闌干外。共指溪河水一條。東行便是浙江潮。白頭未免鄉心動。即欲乘風上小
船。

何素峰居士招飲仇樹汪園座中黃甘泉巴雋堂汪漁村等十一人各賦一詩

何遜風騷主。招為野外吟。引涼高樹早。聞笛老懷深。美酒出金谷。羣賢聚竹林。新詩歸各咏。漢上續題襟。

余十二歲入泮。即讀吳冠山先生文。今五十六年矣。雄村歸後。方知先生家住溪南。相離不遠。缺於一面。心殊眷然。賦詩奉寄。

文章早歲便相師。垂老相逢願屢違。千里名山空蠟屐。兩朝前輩未摳衣。溫公獨樂郊居久。魯殿靈光海內稀。咫尺丈人峰未上。鳥飛已過倍依依。

同秀才黃世增劉志鵬登齊雲山

登山非登舟。輿夫多曳纜。想見齊雲高。飛鳥猶股戰。初臨雙松橋。再入桃花澗。離樓灌木陰。屈曲陂陀旋。路斷一洞開。石裂諸天見。懸崖高幕張。吞覆碧池面。遊人在下行。驟雨衣不濺。但訝珍珠簾。挂空千條線。趺坐未片時。陰晴狀又變。天門有單複。一重又一重。我欲

謁真宰。二客為先容。哀壑勢杳窅。怪峰形穴隆。橫鉞疑斧劈。密縫類雲封。駭駭門列鼓。礧礧屋懸鐘。三姑既已接。五老重相逢。開口戲相喚。應者聲滿空。遙望西天門。欲往未可窮。且宿百子樓。正對香爐峰。此峰真豪傑。崛起山當中。

從江村冒雨至黃山湯口

不獨晴行雨亦行。江村卅里盡溪聲。無心見客草冠好。有意上山行李輕。榴火照人紅冉冉。秧針搖水綠盈盈。夫容萬壑雲中立。知是山靈抗手迎。

湯泉浴

萬仞蒼崖覆浴室。早知勾漏有砂床。一泓碧玉煖如許。半日熏風坐未央。酌飲最憐香氣味。試來難轉冷心腸。何時得上知章表。乞作幽人湯沐莊。

過回龍橋聽土人說起蛟事

行過回龍橋。山痕破羣綠。怪石何崩奔。滿院堆瑩确。土人為我言。此處龍起陸。一龍將升天。八百蛟相逐。噴雷兼洒雨。撒沙且飛雷。尾學蜃尤搖。頭作共工觸。未免恃龍威。摧殘到草木。龍視蛟如奴。縱之忘束縛。蛟視山如無。氣欲吞五嶽。送龍入海後。蛟仍返舊壑。當其得志時。力可移山岳。及其失勢後。瑟縮泥中伏。往往三冬氓。伐蛟食蛟肉。感此氣化機。元黃有剝復。山川尚逢劫。人世真局促。勸蛟慎行藏。勸龍管僚屬。頑石聽余言。點頭滿山谷。

一枝

一枝筇竹杖。直上白雲端。性命關呼吸。雲山始大觀。仙禽奏音樂。古柏作闌干。五月端陽近。重裘尚覺寒。

宿慈光寺觀前明萬曆宮中賜普門和尚袈裟金鉢

古鉢金光耀紫煙。袈裟針脚尚新鮮。禪師披出難消受。千個如來坐滿肩。

從慈光寺步行穿石洞上木梯到文殊院

青天豈可削。黃山峰如刀。刀上豈可躡。黃山路莫逃。初入雲巢洞。再上脫凡橋。一梯既升天。萬嶺如湧潮。趾未納二分。雲已埋半腰。仗手不仗足。手可攀樹梢。選石如選几。一坐償百勞。土人指峰名。附會真堪嘲。逼視頗不肖。遙睇偏相撩。到寺魂小定。滿胸山尚搖。

一路望天都。蓮花二峰半。為雲掩到院。少頃始露全峰。

山如新婦羞相見。故使雲為半面妝。坐待片時才却扇。天公教我捉迷藏。

端陽阻雨文殊院雲來遮門一無所見午後小晴步至立雪臺望前後海諸山

端陽開門人世換。不見人形但聞喚。身入元黃混沌中。但聞雨腳聲聲滴不斷。大風西南來。勢若奔萬馬。老僧生怕寺飛去。扛取奇峰壓屋瓦。須臾雲氣重重開。我乃支筇立雪臺。前海後海看崔巍。許看不許看。全憑雲主張。趁此雲歸家。亟亟左右望。可惜黃山大雨眼。小萬

簇青青看不了。且倚松身當床卧。更折松枝把苔掃。除却雙桃獅象玉屏風。只愛偃僂一峰有似老人老。

章亦周秀才與山僧同迎至硃砂峰下

老僧揖我右。秀才揖我左。儒釋一齊迎。不覺笑言瑳。秀才負高懷。久斷紅塵鎖。時時抱孤琴。到此峰頭坐。彈開雲數重。驚落花幾朵。不負山外山。真乃可人可。始知曠達人。世間不止我。雨後自文殊院左折而下。過百步雲梯一綫天。鰲魚洞是黃山最險處。

雨過灘勢急。水與人爭路。危磴高且滑。飛鳥行難度。鞋苦聲確窰。杖恐軟沙誤。鄧艾難裹氈。董父但懸布。劍戟下自天。頭仰驚石怒。小却學蜷屈。徐引作蛇走。疑虛背怯倚。審固趾才措。豈徒三次休。兼貪四面顧。安得億萬身。一峰一翔步。平生見慣天。忽然一綫小。且喜

雙屐夾。雖跌不得倒。石覆黑如夜。罅露白成曉。乳竇閑沉沉。靈泉滴悄悄。扶人松可感。迷人雲可惱。才為井底蛙。俄作升天鳥。有意示人難。造化關姦巧。銳進固有拒。退縮亦難保。不能乞山靈。放平憐我老。只好息喘吐。忍死往前討。鰲魚張口吞。入者貌都慘。我獨勇登

先。所恃惟一敢。穿腹乃踏背。入坎復出坎。遠望煉丹臺。松針似鋪毯。近看蓮蕊峰。幽露含蕊

蕊。因之語遊人。自視慎毋欺。果有猛進功。萬境無不攬。何必肉飛仙。虎目眈眈眈。只須趙

子龍。渾身都是膽。

坐蒲團石回望慈光寺在萬山之中如落釜底

小坐蒲團望碧霄。眼空下界察秋毫。如何低極慈光寺。昨日來時只覺高。

坐光明頂上老僧送茶至

風吹帽落帶繞頸。履踏蒼苔濕至脛。看山看到衆山無。自知身到光明頂。此頂寬平容萬馬。前後兩海界井井。衆嶺森羅腳底來。憑我恣餐如列鼎。或指九華浮遠翠。或說雙丸騰倒景。或夸陵陽青百重。或詫宛陵烟萬頃。我從絕險得坦途。小坐片時心耿耿。譬如聽過鈞天樂。雖有他樂不敢請。又如強弩射潮回。曾編再穿力不猛。方學渴貌思飲海。忽見老僧來送茗。和雲帶露一吸乾。滿腹金莖仙露冷。

上蓮花峰至半途以風大而止遣人登頂取香砂嗅之果然作詩二首

非關足力差。實畏終風暴。莫怪青蓮花。顧我只管笑。想把鎖雲囊裏去。散來人世作天花。

宿獅子林晨起清涼台看雲鋪海

清涼臺高迥絕倫。我登正值山鋪雲。一疋布將大地裹。千條練許山靈分。初散後聚結作片。左缺右補團成群。青峰幾重未減頂。風行水上成奇文。誰持銅斗向空廚。塵散萬頃玻璃紋。疑是王家元寶闢國富。樹樹絹掛南山勻。又疑裴氏蓋田新開墾。耕烟種草龍殷勤。王母

瑤池砌白玉。秦陵江海流。水銀萬頃鑄丹鼎。求羊欣亂書白練裙。相較都覺有痕迹。不如
此處自然一氣吹。氤氳更喜此身立雲上。任他白衣蒼狗來紛紛。為我一謝雲中君。高歌此
曲聞不聞。

觀鋪海時甚苦太陽思有掩覆之者。忽然雲生。竟得倚松而坐。

人心一念動。天上片雲起。高雲起空中。低雲起脚底。高者若張蓋。遮日殊有情。低者若游戲。鋪
海尤分明。俯首看塵市。仰首謝碧落。倘非雲上雲。安得樂中樂。

望天都峰不果上

天都高絕與天隣。欲上頻看七尺身。底事望雲頻縮足。雲中不見下來人。

登始信峰

接引松觀棋散花進寶諸峯俱在此

雙峰若雙闕。壁立青天近。久聞人世傳。不信今始信。陡上最艱難。占卦類得因。盤旋蟻封曲。
出沒鵝鵲陣。愁臺身屢繞。澠池翼勉奮。我到此峰前。開目得一瞬。危哉小石橋。跨空僅盈寸。
途寬尚可返。勢迫惟有進。賴松來引人。援手如相認。

穿出石罅後。別有山重重。天女

花盡散。仙人棋未終。啞然笑富媼。多峯以為寶。幸喜諸兒孫。頭角都要好。下有沉沉溪。望之
如下天。縱使身墜下。得到知幾年。我欲投長繩。量他深幾許。又恐半空中。蛟龍來攫取。

到西海門看落日。山中藏山頗似天台瓊臺。

媧皇鍊石石無用。秦王驅山山大重。一齊放向西海門。稜稜萬古猶飛動。門外屏風遮迥周。門中武庫藏戈矛。嵌空精鉄盡辟立。瓊臺突起勢未休。處處惹人作危想。失脚一落誰相留。自非生死度外客。到此誰敢開雙眸。我胡留連不肯去。來世或到今生不。其奈金輪閻屋上海來。捧山先收不得已。乃下山走。遲恐星辰亂打頭。

從朱陵塢繞出天都蓮花二峯之背到雲谷看九龍瀑布乘輿下山

青山長往人不住。看過青山人欲去。但從腹背盡經過。看山才領全山趣。朱陵塢下路陂陀。過此陂陀平不頗。明知未到峰無數。但舉知名到已多。賓朋相逐色欣欣。世上人迎世外人。我亦回頭隔兩塵。衣裳尚帶烟霞痕。雲谷飛泉走石隙。銀河倒落三千尺。似怕歸途太寂寥。特遣九條龍送客。關心甘苦。夕乘除。痛定思痛樂有餘。自從足繭千山後。纔信乘車是大夫。

土人能負客遊山者號曰海馬作歌贈之

黃山有浪真健者。雲海橫行力如馬。慣負遊人絕頂遊。人亦渾忘馬是假。自言少小學飛猱。千巖萬壑行周遭。勇可習也胆可養。足所踐處無卑高。老我遊山不自量。目極危崖心想上。仗汝行纏縛向肩。衝沙犯嶺雲爭讓。初登始信兩三峰。繼極蓮花千萬丈。暗中偷眼往下注。純是死生呼吸處。不信飛廉果解飛。且學孟捨能無懼。疑人不用用勿疑。託孤寄命憑

他去果然負重力能勝。個個身如著翅行。有時故意作疾走。萬山隨我同奔騰。地雖無土總能踏。天如有階亦可升。上比商丘開。出入水火無驚猜。下比崑崙奴。飛行絕迹何殊乎。八日遊山事已了。策勛那更如渠好。不著黃襪肯負人。並非赤兔能先鳥。祇我思量轉自憐。七十老翁猶襁褓。

悼松

黃山之松世少伍。不在高長在奇古。根未離地身已曲。性似畏天頭早俯。森布儼同華蓋張。崛強慣從石縫吐。不階尺土真英雄。接引遊人類佛祖。擾龍破石苦團圞。載入詩歌畫入譜。一朝人力少周防。甘受樵夫斤與斧。拉雜摧燒漸漸空。八九依稀存二五。奇峰不見瘦蛟蟠。絕巘空餘弱草舞。老僧膜拜力難救。青山無言色慘怛。果為梁棟支明堂。松縱受戕心亦許。其如當作腐草看。半入爆蓬炊瓦釜。古來刻數總皆然。萬事原非天作主。重鞭駿馬背負鹽盤。蒸美人頭作脯。世充書卷盡沉河。阿房一炬偏遭楚。可憐松亦與之同。帶露含霜變灰土。我欲上表通天臺。玉皇敕下群官府。栽培保護三千年。或者奇松還再補。河清可俟人壽難。獨對荒山淚如雨。

筆花峰

危石尖如筆。當尖松樹斜。濃雲如潑墨。開出後凋花。

小心坡

險極坡難過。小心各自持。勸君平地上。還似過坡時。

音樂鳥

髻髻歸昌律。簫韶奏太虛。漢王真識曲。鳴鳥愛樊衡。

木蓮花

雲海漫波濤。一碧千萬頃。蓮花認作池。誤生高樹頂。

捨身崖二首

捨身如捨錢。但須值得耳。樂哉此崖子。莽莽仙雲起。安得李清繩。墜我直到底。再過一千年。依舊我歸矣。千重烟水萬重崖。絕似瑤池白玉臺。多少貴人身忽捨。可能捨到此崖來。

紫石峰

南朝三十六英雄。散作黃山處處峰。獨有此公顏色異。玉皇別與紫泥封。

偶成

是處庵俱到。無求佛亦知。月來如有約。雲去不相辭。旅舍難為飯。車中易得詩。歸添行李重。松樹兩三枝。

惱雲

山下看雲樂。山上受雲苦。雲氣忽然來。萬目一齊聳。不去為霖雨。徒來作渾敦。黃山倘再上。先置掃雲人。

謝杖

艱險憑誰共。孤筇最可憐。握添腰脚健。扶比子孫賢。絕壁風高處。荒灘水急天。若非君助我。若個與周旋。

聽水有悟

水性比人急。有觸怒即起。化為裂帛聲。花花聲不止。恍讀韓蘇詩。一韻直到底。要知山太靜。非此無聲脚。古來傳道者。不傳耳聾人。

茶亭

茶亭幾度息勞新。慙愧塵寰著此身。輸與路旁三丈樹。陰他多少借涼人。

繩

山頂蛟蟲盡。蕭然絕點塵。蒼蠅偏不斷。高處有說人。

太平道上寄懷巴雋堂中翰

我游黃山無主人。黃山為主我為賓。誰知尚有主中主。巴君軒軒更霞舉。去年早欲來訪君。人言君看瀟湘雲。今年無心忽相見。春水可剪情難分。呼童急掃陸機屋。留我陳蕃榻上宿。

晨起摩松露氣清。夜深說鬼燈光綠。崔錄雖碑無不有。天生兩隻摩崖手。藏得蘭亭字數行。此碑不向昭陵朽。誰云老据無詞童。君獨兩家兼擅長。高歌七言長短句。天風海水音琅琅。山靈促我縛蠟屐。欲行不行留七日。君更依依送出城。下車握手難為情。轉瞬丹台游已過。漸漸九華山又大。掉頭烟裡苦相思。三十六峯人一個。

陵陽鎮有甯氏者族八千人云自光武時卜居至今未曾他徙余宿其家作詩贈之
建武有遺民。陵陽住水濱。不曾知魏晉。那復羨朱陳。一姓同輸課。千昆自結隣。欣欣雖泰意。雲外共迎賓。

九華山

九華如屏風。好處都在外。勢有龍門高。徑無鹿角隘。直登天台巔。氣象始覺大。霞標多遠矚。巖景少近愛。相傳新羅王。此處持法戒。爲共魚泳游。虎隨僧禮拜。十年委蛻形。舍利今猶在。萬釘包塔縫。銅鑄發光怪。從從走十方。到此作頂戴。僧因香火富。佛被禪門壞。我亦三日留。了此遊山債。

家春圃設醮九華僧有爭香火相毆者戲題二絕

禪門閒看白雲飛。從不燒香惹是非。生怕佛靈能降福。受他恩重要歸依。
不求佛。佛手拈花笑不消。道我至今心抱歎。未曾一粒施臺城。

貴池同童伯龍公子周益三秀才泛舟齊山

兩面湖光一道堤。風烟絕似聖湖西。亂峯委地矮逾峭。古柳受潮高復低。穿石洞行疑出世。攀藤蘿上似登梯。姓名畢竟摩崖好。七百年來認舊題。
齊山二字包孝肅書岳忠武王陽明俱有題詠

過文選樓弔昭明太子

蕭梁宮殿久蕭條。剩有書樓聳碧霄。生共河間扶大雅。死隨子晉賦逍遙。人間家嗣思雖薄。天上文星位不祧。聞說池陽靈最著。夜深時見采旗飄。

宿五溪有懷亦輩上人

遊遍千山與萬山。好山容易好僧難。偶來蕭寺停遊屐。得見支公在講壇。妙語直教花欲笑。詩成常被佛偷看。與師邂逅雲堂意。雨後吹來月一丸。

寄德中師

九華三日住。頗憶德中師。妙相生歡喜。多情惱別離。登臨先引路。布施但求詩。定有前緣在。青天明月知。

謁余忠宣公墓登大觀亭

一旅曾揮落日戈。大觀亭畔冢嵯峨。忠臣也要江山助。岳墓西湖酒奠多。

近來

近來愛賦遠遊篇。到處逢迎感宿緣。楊柳身高絲到地。閒雲心冷影橫天。僧廬有字先看壁。石洞無茶且飲泉。兩月離家千度笑。幾人如我送衰年。

四月六日出門六月五日還山

家居久自嫌。遠歸身忽覺。妻孥迎到門。顏色若有異。亟亟問平安。欣欣白家事。黃犬亦有情。搖尾從外至。稚子各牽衣。爭先兄如弟。重登讀書堂。再到看花地。卷軸拭灰塵。尊罍加布置。分明所饜餐。到口覺有味。恍惚衾裯間。舊寵疑新嬖。某友書尚絅。某物藏還記。回頭豈出夢。一笑如隔世。敢云謫仙人。依然復舊位。自是出山雲。來去總隨意。

兩接香亭家信戒我遊山賦詩答之

七十扶筇涉險忙。阿連屢次戒行裝。那知此老有天幸。六月在途如許涼。樂府休歌行路難。江山原待達人看。歸來更有心開事。竹比去年多幾竿。荆樹殘花剩兩枝。弟兄白髮倍相思。為言黃海人歸矣。宦海人歸在幾時。

南陵道上喜晤宣州太守孫公別後却寄

有序

公諱述曾。字敦夫。是子己未年居停主人也。其時公纔七歲。尊人牧堂太史。延余權記室事。余釋褐館選。俱主其家。今太史久亡。而敦夫亦兩鬢蒼然矣。旅次相逢。感而有贈。